



JUDICIAL SYSTEM MONITORING PROGRAMME  
PROGRAMA MONITORIZASAUN BA SISTEMA JUDISIÁRIU

**Komunikadu Imprensa**  
**Tribunál Distritál Baucau**  
**08 Jullu 2016**

**Tribunál kondena arguidu ba kazu inestu bazeia prova úniku hosi lezada:  
Progresu ida iha aspektu sensibilidade tribunál nian**

Iha 30 Juñu 2016, Tribunál Distritál Baucau kondena arguidu ba kazu inestu bazeia prova úniku ne'ebé mai-hosi lezada nia deklarasaun katak nia aman mak komete violasaun seksuál hasoru nia.

Tribunál kondena arguidu ho pena prizaun tinan 15 tanba arguidu provadu komete krime violasaun seksuál hasoru nia-oan feto rasik (ho idade-tinan 16 fulan 6), ne'ebé akontese iha 12 Agostu 2015, iha tuku 20:00 kalan, iha Distritu Manatuto.

“Kondenasaun ho prova úniku hosi lezada ne'e nu'udar pasu-progresu ida iha kazu sira involve violasaun seksuál ho natureza inestu, tanba normalmente juis sira sempre kaer-metin ba prinsipiu prova adekuaudu antes kondena arguidu ruma, “ dehan Diretór Ezekutivu JSMP, Luis de Oliveira Sampaio.

JSMP apresia avansu ida-ne'e, tanba mesmu arguidu rejeita akuzasaun no testemuña sira ne'ebé inklui lezada ninia-inan rasik la fó evidénsia ne'ebé klaru ba tribunál.

Ministériu Públiku akuza arguidu kontra artigu 172 Kódigu Penál kona-ba violasaun no 173 alínea (a) kona-ba agravasaun bazeia ba relasaun familiár no (d) kona-ba agravasaun bazeia ba vítima-nia idade ne'ebé ki'ik liu tinan 17, konjuga ho artigu 35 Lei Kontra Violénsia Doméstika.

Tribunál prova katak arguidu tama derepente ba iha lezada nia kuartu laran no husu atu halo relasaun seksuál maibé lezada rejeita. Arguidu kontinua buka meus oinsa bele realiza nia-intensaun no bolu lezada ba kumu arguidu nia-isin iha arguidu nia kuartu laran. Tanba tauk lezada obrigadu ba duni no wainhira lezada tama ba iha kuartu laran, lezada hare arguidu sein roupa/hena ruma iha nia isin-loloon. Arguidu ko'us obriga lezada ba iha kama leten no komete violasaun seksuál hasoru lezada.

Enkuantu faktu seluk kona-ba arguidu sempre hatudu nia orgaun seksuál no hatudu filme ladiak iha telefone ba lezada wainhira lezada sei idade tinan 14, la provadu tanba lezada mós rejeita.

Iha julgamentu arguidu deklara katak nia lakomete krime ne'e. Iha parte seluk, testemuña sira ne'ebé nu'udar lezada nia avon deklara katak sira la hare rasik akontesementu ne'e, maibe lezada mak konta-tuir ba sira kona-ba arguidu ninia hahalok ne'e. Testemuña seluk ne'ebé nu'udar lezada ninia-inan rasik deklara katak iha momentu ne'ebá, nia iha uma deit, maibe nia lahatene kona-ba akontesementu ne'e.

Iha alegasaun finál, ministériu públiku husu tribunál aplika pena prizaun tinan 18 tanba ministériu públiku konsidera katak arguidu komete duni krime hasoru lezada. Enkuantu defeza husu ba tribunál atu absolve arguidu tanba bazeia ba arguidu nia deklarasaun katak nia la komete violasaun seksuál hasoru lezada. Aleinde ne'e depoimentu hosi arguidu lezada nia-inan katak nia iha uma loron tomak no la hare no rona akontesimentu ruma entre arguidu no lezada.

Kazu ne'e rejista iha tribunál ho Nú. Prosesu: 0015/15.MNLAL. Julgamentu prezide hosi reprezenta juis kolektivu Dra. Ercilia de Jesus, Ministériu Públiku reprezenta hosi Dr. Luis H. Rangel da Cruz no arguidu hetan defeza hosi Dr. Jose M. Guterres hosi Defensória Públiku.

Atu hetan informasaun kompleitu, favor kontaktu:

Luis de Oliveira Sampaio

Diretór Ezekutivu JSMP

Diresaun e-mail: [luis@jsmp.minihub.org](mailto:luis@jsmp.minihub.org)